

## **А Ж Р И М**

(даъво аризасини кўрмасдан қолдириш тўғрисида)

**Навоий шаҳри  
2023 йил 16 май**

Кармана туманлараро иқтисодий судининг судьяси Б.Джумаевнинг раислигида, судья ёрдамчиси М.Жамиловнинг котиблигида, Қизилтепа туман фермер, деҳқон хўжаликлари ва томорқа ер эгалари кенгашининг даъвогар “Сайдо” фермер хўжалиги манфаатини кўзлаб, жавобгар “Textile Navoiy Group” масъулияти чекланган жамиятига нисбатан киритилган даъво аризаси бўйича ишни ўз маъмурий биносида бўлиб ўтган очиқ суд мажлисида тарафлар вакиллари иштирокисиз кўриб чиқиб, қуйидагиларни

### **А Н И Қ Л А Д И:**

Қизилтепа туман фермер, деҳқон хўжаликлари ва томорқа ер эгалари кенгашининг даъвогар “Сайдо” фермер хўжалиги манфаатини кўзлаб, жавобгар “Textile Navoiy Group” масъулияти чекланган жамиятига нисбатан 401.601.740 сўм асосий қарз, 15.421.506 сўм пеня, 100.400.435 сўм жарима ундиришни сўраган.

Белгиланган тартибда хабардор қилинган кенгаш, даъвогар ва жавобгар вакиллари суд мажлисида иштирок этмади.

Даъво аризаси суднинг 2023 йил 1 майдаги ажрими билан иш юритишга қабул қилиниб, ишни кўриш 2023 йил 16 май куни соат 10<sup>00</sup>да Кармана туманлараро иқтисодий суди биносида кўриб чиқиш учун тайинланган.

Даъвогарга ажрим юборилган ҳамда почта маълумотномасига кўра, ажрим 2023 йил 8 майда даъвогарга етказиб берилган. Шунингдек, фермер хўжалиги манфаатини кўзлаб чиққан Қизилтепа туман фермер, деҳқон хўжаликлари ва томорқа ер эгалари кенгашига 05.05.2023 йилда етказиб берилган.

Бироқ, даъвогар биринчи суд мажлисига келмади, ваколатли вакил иштирокини таъминламади. Шунингдек, кенгаш вакили ҳам суд мажлисига келмади, ишни ўзининг вакили иштирокисиз кўриб чиқишни сўрамаган.

Ўзбекистон Республикаси Иқтисодий процессуал кодекси (бундан буён матнда-ИПК)нинг 170-моддасига кўра, иш муҳокамасининг вақти ва жойи тўғрисида тегишли тарзда хабардор қилинган даъвогар суд мажлисига келмаса, даъвогарнинг ишни унинг йўқлигида кўриш тўғрисидаги



аризаси бўлган тақдирдагина, низо унинг йўқлигида ҳал қилиниши мумкин.

ИПК 107-моддаси биринчи қисмининг 6-бандига кўра, даъвогар биринчи суд мажлисига келмаган ва ишни ўзининг иштирокисиз кўрилиши тўғрисида арз қилмаган бўлса, суд даъво аризасини кўрмасдан қолдиради.

Шу сабабли суд, даъвогар биринчи суд мажлисига келмаганлиги ва ишни ўзининг иштирокисиз кўриб чиқиш тўғрисида ариза тақдим этмаганлиги сабабли даъво аризасини кўрмасдан қолдиришни лозим топади.

Суд ишни кўриш билан боғлиқ суд харажатларини даъвогар зиммасига юклашни, даъвогар томонидан олдиндан тўлаб берилган 30.000 сўм почта харажатлари даъвогар зиммасига қолдиришни лозим топади.

Юқоридагиларга кўра ҳамда Ўзбекистон Республикаси Иқтисодий процессуал кодекси 107-моддаси биринчи қисмининг 6-банди, 195-моддаларини қўллаб, суд

#### А Ж Р И М Қ И Л Д И :

Қизилтепа туман фермер, деҳқон хўжаликлари ва томорқа ер эгалари кенгашининг даъвогар “Сайдо” фермер хўжалиги манфаатини кўзлаб, жавобгар “Textile Navoiy Group” масъулияти чекланган жамиятига нисбатан 401.601.740 сўм асосий қарз, 15.421.506 сўм пеня, 100.400.435 сўм жарима ундириш тўғрисидаги даъво аризаси кўрмасдан қолдирилсин.

Даъвогар томонидан олдиндан тўлаб берилган почта харажатлари ўз зиммасига қолдирилсин.

Ушбу ажримдан норози тараф бир ойлик муддат ичида Навоий вилоят судига апелляция тартибида шикоят қилиши, прокурор протест келтириши мумкин.

Раислик этувчи, судья  
Б.Джумаев

